

包氏醫宗

第二集 第四卷

雜病論講義
冊下



包氏醫宗第二集目錄

▲內科學瘍科婦人科學附

卷之一

雜病論章節

一冊

卷之二

雜病方法

附歌括

一冊

卷之三

雜病表

附表式

一冊

卷之四

雜病論講義

二冊

卷之五

雜病方講義

一冊

(第二集售銀伍圓)

版權有所不致翻印

中華民國十九年一月出版

包氏醫宗第二集第四卷

雜病論講義二冊

著作者 閩杭包識生

出版者 包氏醫宗出版部

總發行 包氏醫宗出版部

上海北泥城橋新開路

口鴻祥里二一四五號

代售處 各大書局



痰飲欬嗽病脈證篇第十二

痰飲欬嗽病上焦病也痰飲皆爲積水之變化而成在肺腸瀝瀝有聲者曰痰無聲者曰飲又濃者曰痰清者曰飲夫人身津液水飲痰皆爲同一種類因上焦之氣不能布化水液以致停積胸中作痰飲欬嗽之病有痰飲者多有欬有欬者又多有痰痰飲欬嗽實二而一一而二者也故合論之

第一章 痰飲欬嗽總論

第一節 痰飲種類之名稱

問曰夫飲有四何謂也師曰有痰飲有懸飲有溢飲有支飲

第二節 痰飲種類之病狀

問曰四飲何以爲異師曰其人素盛今瘦水走腸間瀝瀝有聲謂之痰飲飲後水流在脇下欬唾引痛謂之懸飲飲水流行歸於四肢當汗出而不汗出身體疼重謂之溢飲欬逆倚息不得臥其形如腫謂之支飲

先師分飲爲四水飲下走腸間瀝瀝有聲爲痰飲水飲上逆肺欬倚息形腫爲支飲水飲內蓄欬唾引脇痛爲懸飲水飲外溢四肢身體疼重爲溢飲痰飲痰流於下懸飲飲懸於脇溢飲飲溢四肢身體支飲如支拄於肺之狀也然痰飲與痰有由肺而出形濃質濁者皆謂之痰痰飲水因於痰者也

又按飲已主肺有聲瀝瀝曰痰積留各部曰飲其實痰飲甚難分亦不必分也

第二章 痰飲病源

第一節 水在心

水在心心下堅築短氣惡水不欲飲

心下堅築水積於心也短氣肺氣因所阻也惡水不欲飲心火被水所尅故見水則畏而不欲飲也

第二節 水在肺

水在肺吐涎沫欲飲水

水積於肺因肺不能排泄水飲以致積而爲涎沫然肺氣不下達則胃府之津液乾燥故欲飲水也

第三節 水在脾

水在脾少氣身重

脾主中州中土積水中氣不化故少氣脾主肌肉脾有積水則肌肉亦必有溼故身重

第四節 水在肝

水在肝脇下支滿噎而痛

肝位於脇肝有積水脇下則支拄脹滿也噎則氣暴出相引而痛

第五節 水在腎

水在腎心下悸

心屬火而腎屬水水在腎浸凌於心故心下悸也

第二章 五藏飲

第一節 心藏留飲

夫心下有留飲其人背寒冷如掌大

心爲陽中之太陽屬火背亦爲太陽且心位與背心特對心中留飲而心火不揚陰寒凝結故背寒冷如掌大也按冷如掌大與全背惡寒者又不同因心之大小恰如掌大也

第二節 肝藏留飲

留飲者脇下痛引缺盆欬則輒已

肝有留飲故脇下作痛缺盆爲氣之道肝氣上逆引動缺盆欬則痛輒不已也

第三節 脾藏留飲

胸中有留飲其人短氣而渴四肢歷節痛脈沉者有留飲

人身之水飲全賴中焦脾氣之運化脾不運化則水停胸中而氣爲短水不佈化則胃液乾燥而渴脾藏留飲則四肢無宣發之陽而現四肢歷節痛脈沉者非上焦之肺水爲中焦之伏飲也

第四節 肺藏留飲

膈上病痰滿喘欬唾發則寒熱背痛腰疼目泣自出其人振振身瞤劇必有伏飲

膈上病痰滿喘欬唾之證肺藏留有飲水也肺主皮毛肺氣不達則發生表證之寒熱背痛腰疼目泣自出振振身瞤諸現象也若病之劇者必由痰病而變爲飲病矣

第五節

腎藏留飲

夫病人飲水多必暴喘滿凡食少飲多水停心下甚者則悸微者短氣脈雙弦者寒也皆大下後喜虛脈偏弦者飲也肺飲不弦但苦喘短氣支飲亦喘而不能臥加短氣其脈平也

腎爲生水之源又司排泄之職所謂司水之神是也腎氣微弱則水不行若飲水多則必暴喘滿水停心下心悸短氣也又按人身之根本在尺尺腎氣所由出也脈雙弦者正氣虛寒陰精內動也偏弦者飲水內蓄陽氣不宣也惟肺有飲水病在氣而不在血故不弦而苦喘短氣也支飲亦爲肺病故其脈平而氣亦喘

第四章

痰飲治法

第一節

痰飲治法總論

病痰飲者當以溫藥和之

身熱則水化爲氣津液乾而口燥身寒則氣化爲水津液凝而吐痰故病痰飲者總當以溫和之此以下三方皆溫和之法也

第二節 上焦痰飲治法

心下有痰飲胸脇支滿目眩苓桂朮甘湯主之

痰飲伏於心下飲水上逆於胸頭目爲之暈眩也故胸脇支挂作滿目眩也

第三節 下焦痰飲治法

夫短氣有微飲當從小便去之苓桂朮甘湯主之腎氣丸亦主之

短氣下焦之氣不接上焦之氣也因下焦有微飲命門之元氣不能接續至肺而短氣故以苓桂朮甘或腎氣丸利其小便可也

第四節 中焦痰飲治法

病者脈伏其人欲自利利反快雖利心下續堅滿此爲留飲欲去故也甘遂半夏湯主之
痰飲伏留於中焦隨胃腸之下泄而自利則飲去故利反快然病本不去雖利後反快而心下續堅滿如故也非以甘遂半夏攻其留飲隨其利而瀉之不能痊愈也

第五章 懸飲治法

第一節 熱飲脈

脈浮而細滑傷飲

浮而細滑飲有熱之脈也脈證反者難治飲而曰傷正氣爲飲所傷也飲之壞病也

第二節 寒飲脈

脈弦數有寒飲冬夏難治

弦爲陰脈數爲陽脈寒熱不分陰陽交作故逢極寒極熱之候得此者亦難治之證也

第三節 懸飲治法

脈沉而弦者懸飲內痛病懸飲者十棗湯主之

懸飲脇痛肝之證也脈沉弦肝之脈也十棗湯攻胸腹積水之品以治懸飲至當之方也

第六章 溢飲治法

第一節 溢飲治法

病溢飲者當發其汗大青龍湯主之小青龍湯亦主之

溢飲水流行於四肢當汗之故以大小青龍發其表之汗也

第七章 支飲治法

第一節 肝支飲虛實治法

膈間支飲其人喘滿心下痞堅面色黧黑其脈沉緊得之數十日醫吐下之不愈木防己湯主之虛者卽愈實者三日復發復與不愈者宜木防己湯去石膏加茯苓芒硝湯主之

膈間支飲肝經留有飲水也支拄作脹故其人喘滿心下痞堅肝氣不和肝主色故面色黧黑而脈

沉緊也治以木防己湯消其飲緩其虛清其熱實者當攻之宜去石膏之清涼增芒硝之鹹寒茯苓之利水也

第二節 腎支飲利水治法

心下有支飲其人苦冒眩澤瀉湯主之

支飲而眩冒水結於心下腎水上渙作冒也用澤朮以利其水也

第三節 心支飲瀉火治法

支飲胸滿者厚樸大黃湯主之

支飲胸滿心火內炎故以厚樸大黃瀉其君火也

第四節 肺支飲瀉肺治法

支飲不得息葶藶大棗瀉肺湯主之

支飲不得息肺氣實也故用葶藶瀉肺也

第五節 脾支飲降逆治法

嘔家本渴渴者爲欲解今反不渴心下有支飲故也小半夏湯主之

嘔者本脾胃之氣上逆而作也嘔而若渴胃陽化燥故渴者爲欲解嘔而不渴中焦之陽不化被陰寒所制而不能宣發其穀氣今反不渴者因心下有支飲伏留使中氣不佈化鬱鬱而作嘔須以小

半夏破其中焦之飲而嘔自止也

第八章 水氣治法

第一節 中焦水氣治法

腹滿口舌乾燥此腸間有水氣已椒蘆黃丸主之

腹滿中焦之氣不佈化也脾胃開竅於口中氣不佈則水當升而不能升停於腸間火當降而不能降而口舌燥也已椒蘆黃通中氣破積水之妙劑也

第二節 上焦水氣治法

卒嘔吐心下痞膈間有水眩悸者小半夏加茯苓湯主之

卒嘔吐中氣上逆於上焦以致心下痞膈間有水眩而悸上焦之肺氣不能通調水道以小半夏加茯苓降其逆氣而利其水道也

第三節 下焦水氣治法

假令瘦人臍下有悸吐涎沫而顛眩此水也五苓散主之

瘦人臍下有悸下焦之真陽不足而水停腎之臍下也腎氣不升則肺氣不降而吐涎沫顛眩水氣上凌於腦府以五苓散通其水則水去陽升

第九章 欬嗽治法

第一節 欬脈攻裏治法

欬家其脈弦爲有水十棗湯主之

此言水飲作欬可攻裏之脈象也欬而脈弦弦爲水動十棗湯瀉之從裏而解也

第二節 欬證攻裏治法

夫有支飲家欬煩胸中痛者不卒死至一百日或一歲宜以十棗湯

支飲欬而煩胸中痛飲水停留作痛也此胸痛與結胸異不卒死之證縱遷延至百日或一歲仍宜十棗攻其飲也此二節從裏治之法也與下文小青龍從表治之法不同

第三節 欬脈虛實生死法

久欬數歲其脈弱者可治實大數者死其脈虛者必苦冒其人本有支飲在胸中故也治屬飲家

久欬數歲正氣必虛虛證當得虛脈故其脈弱者可治若虛證得實脈而反實大數者其證必死也正氣外脫正衰邪盛也然虛者爲正氣已虛不能佈化其陽氣以致飲停胸中必苦冒眩治當屬於飲家

第四節 欬嗽攻表治法

欬逆倚息不得臥小青龍湯主之

青龍湯下已多唾口燥寸脈沉尺脈微手足厥逆氣從小腹上衝胸咽手足痺其面翕熱如醉狀因復下

流陰股小便難時復冒者與茯苓桂枝五味甘草湯治其氣衝

衝氣卽低而反更欬胸滿者用茯苓桂枝五味甘草湯去桂加乾薑細辛以治其欬滿

欬滿卽止而更復渴衝氣復發者以細辛乾薑爲熱藥也服之當遂渴而渴反止者爲支飲也支飲者法當冒冒者必嘔嘔者復內半夏以去其水

水去嘔止其人形腫者加杏仁主之其證應內麻黃以其人遂痺故不內之若逆而內之者必厥所以然者以其人血虛麻黃發其陽故也

若面熱如醉此爲胃熱上衝熏其面加大黃以利之

先渴後嘔爲水停心下此屬飲家小半夏加茯苓湯主之

先師以十棗湯治欬攻裏水從裏而消其飲水也此以小青龍治欬攻表欲從表而散其飲水也欬逆倚息不得臥肺氣上逆上逆當從外散故以小青龍開之然青龍有麻細之傷陽不用麻細而飲水不去用麻細而腎氣又傷故下已多唾口燥寸脈沉尺脈微手足厥逆氣從少腹上衝胸咽也腎氣不納則虛陽上渙脾陽不達手足痺而其面翕熱如醉狀也有時且復下流陰股之間而熱下流則小便難上逆則時復冒當以苓桂味草先治其氣衝若衝氣已平反更欬胸滿納其陽歛其肺欬反甚可以前方去桂加薑辛以治其欬滿復用薑辛熱劑更復渴而氣衝作嘔當納半夏或小半夏加茯苓以去水水去形腫又當加麻杏然麻攻陽陽虛不能用祇可加杏其面熱如醉可加大黃以

利胃熱也





消渴小便不利淋病脈證篇第十三

消渴厥陰證也小便不利淋病少陰證也按肝腎俱屬下焦故合篇論之爲排泄之官失職之下焦病也

第一章 消渴病

第一節 消渴證總論

厥陰之爲病消渴氣上衝心心中疼熱飢而不欲食食則吐下之不肯止

先師以厥陰爲病之總綱爲消渴爲病總綱因消渴證爲肝氣疎泄過度所以渴飲而卽消與肝氣暴出之除中消食證同一意義也

第二節 消渴脈總論

寸口脈浮而遲浮卽爲虛遲卽爲勞虛則衛氣不足勞則營氣竭跌陽脈浮而數浮卽爲氣數卽消穀而大堅氣盛則洩數洩數則堅堅數相搏卽爲消渴

寸口脈浮而遲營衛不足之象也浮卽衛氣不足而爲虛遲則營血因勞而致竭營衛虛竭津血枯涸爲消渴之因也跌陽胃脈浮而數浮卽爲氣之盛數卽爲血之熱氣盛血熱陰亡陽亢以致便堅洩數成消渴之果也由是觀之消渴一證有三種之原因在也一因厥陰風木之太過一因太陰營

衛之虛竭一因陽明陽盛而陰衰也

第三節 腎寒消渴治法

男子消渴小便反多以飲一斗小便亦一斗腎氣丸主之

腎有寒則腎氣不升飲入而不能化而爲液從小便直出故入一斗出一斗也以腎氣丸佐其氣則消渴自止卽所謂虛故引水自救之義同也

第四節 膀胱熱消渴治法

脈浮小便不利微熱消渴宜利小便發汗五苓散主之

此引傷寒之治法也脈浮太陽膀胱經之脈也小便不利微熱消渴爲太陽之表熱不宜故以五苓利小便而兼發汗也

第五節 消渴宣陽治法

渴欲飲水水入則吐者名曰水逆五苓散主之

此引太陽之宣陽治法也渴欲飲水水入則吐陽實於內氣上升也以五苓宣陽卽可止渴利水卽可降逆

第六節 消渴納陰治法

渴欲飲水不止者文蛤散主之



上節因陽實而渴水入則作吐此節因陰虛而渴水入則渴不止飲水不止當用鹹平之文蛤納其陰以滋液而渴自可止也

第二章 淋病

第一節 淋病證狀

淋之爲病小便如粟狀小腹弦急痛引臍中

此淋病與花柳病之白濁證不同此因下焦之熱所作彼因花柳之毒所傷也此則小便如粟色之黃不下白物彼則時下白物小便或黃或白此則小腹弦急痛引臍中彼則小便作痛痛在陰莖此爲胃熱之下注證屬閉癰彼爲毒炎之上攻病名白濁者也

第二節 淋病脈象

跌陽脈數胃中有熱卽消穀引飲大便必堅小便則數

淋病因胃熱下注而作也故跌陽之脈數有熱熱氣下流渴而大便堅小便數而致成淋病也

第三節 淋病禁誤

淋家不可發汗發汗則便血

淋病病屬下焦下焦之病不能治上焦之汗故汗之則陰益傷而小便出血

第四節 淋病利水法

